

TE HEHEURAA API

I Neia I Te Piha Neneiraa A Te Ekalesia A Iesu Mesia I Te
Feia Mo'a No Te Mau Mahana Hopea Nei, I Papeete,
Tahiti, I Te Mau Fenua Sotaiete, I Te Mau
Ava'e Atoa.

Te hoo: EPiti Toata i te Matahiti.

Nu. 12

Novema 1935

Mat. 29

*Ta te Varua e faatupu ra, o te hinaaro ia, te oaoa, te hau,
te faaoromai, te maru, te maitai, te faaroo, te mamahu e te hi-
tahita ore. Galatia 5:22, 23.*

Te Oro'a Rahi i Faatupuhia e Belesazara.

I TE tau i faatupu ai taua Arii ra i taua oroa ra,
ua faaue atura oia ia tiihia te mau au'a o te Hie-
ro no Ierusalema, o tei afaihia mai e Nebukanesa, ei inuraa
na'na e te feia mana i ō na ra, e te mau vahine atoa na'na,
e te mau vahine tavini atoa no'na ra.

Ua hi'o maira râ te Atua i to'na na reiraraa, ua î to'na
aau i te teoteo. Ua faaite maira te Atua i te hoê parau aro;
na te hoê pae rima taata i papai i taua parau aro ra i nia i
te pu'a i mua mai i te lamepa i te aorai o te Arii.

E no to'na hitimaue, ua mahiti to'na tuatiraa ivi tua, e ua paaraara ihora na turi. Ua tii hia te mau taata paari o Babulonia e haere mai e faaite i te auraa o taua parau aro ra, aita râ i iteahia. Ua tiihia o Daniela. I te taeraa'tu â o Daniela i taua Arii ra, ua papai faahou maira taua rima ra i taua parau aro ra, ite atura Daniela i taua parau ra e te auraa atoa.

Ua faaite atura oia i te auraa o taua parau moe ra i te Arii, e teie taua parau moe i papaihia maira; MENE, TE-KELE, PERESE.

E hoa ino ma e! No roto i taua na parau e toru nei, e rave tatou hoê, oia hoi MENE. Ua na ô atura Daniela i te Arii, MENE, *Ua tai'ohia e te Atua to basileia, e ua faaoti.* I to tatou hi'oraa'tu i teie nei parau, te vai mau ra te hoê Apooraa i nia i te ra'i, e te mau parau atoa i faaotihia i roto i taua Apooraa ra, e faaotihia iho â ia. Ua faaotihia e, e horoa taua basileia no to Medai e to Peresia, ua oti iho â ia mai tei reira; ua faaotihia i roto i taua Apooraa ra e, e Diluvi hia teie ao, ua faaotihia iho â ia, no reira ua tae mai te Fatu e ua faaite mai ia Noa e, e diluvi hia teie nei ao, a hamani i te pahi ia ora oe.

Ua faaotihia i roto i taua Apooraa ra e, e taninahia o Sodoma e Gomora i te gopheri, ua faaotihia iho â ia, no reira ua tae mai na melahi ia Aberahama, i Mamera, e ua faaite mai e, e haamouhia Sodoma mâ. Ua faaotihia e, e haamouhia Ierusalem, no reira ua tae mai o Iesu e ua faaite maira oia e, ua fatata to oe tau e taataahihia'i oe e te Etene e e riro oe ei pu'e'a.

Ua faaotihia atoa i roto i taua Apooraa ra e, e tutuihia te feia i farii i te tapao o te puaa i te gopheri, no reira ua tae mai te mau melahi i te pii hua raa e, o tei haamori i te

puaa e to'na hohoa, e tei ia'na te tapao, tei nia i to'na rae e a ore ra tei te rima, e inu ia oia i te uaina faariri a te Atua. Ua papaihia taua piiraa ra i roto i te Apokalupo 14:9.

E hoa ino ma e, a tai'o atoa i te te Apokalupo i te pene 13 mai te irava 11 e tae noa'tu i te hopea o te pene.

Ei parau faaara teie i tuuhiatu ai te *Auahi gopheri* i te hi'oraa'tu i te paura o Sodoma e Gomora, e na te reira i faaite mai e, e auahi taehae roa teie auahi: e amu teie auahi i te fare, te aihere, te mea ota e te mea maro, te puaa, te taata, te repo, te ofai, te one e te pape, e aita e mea e pohe ai oia maori râ ia parau te Atua e, *A faaea*, e i reira oia e faaea'i.

PAPAIHIA E JOAE A MAJRE

TEIE AO

EAHA te hoê tumu ua hamanihia teie nei ao? Rave rahi te tumu, teie râ te hoê tumu rahi, oia hoi, ei parahiraa no te mau varua, e ua riro teie parahiraa no te mau varua i ô nei ei haapiiraa i nia'e i te haapiiraa matamua e no reira, e haapiiraa ia teie nei ao. Te haapiiraa matamua o te ao varua ia, e te haapiiraa piti o teie nei ao ia, e te mau taata tei haapao i te mau faaueraa e te mau ture e tei roaa te ite no taua haapiiraa matamua ra, o ratou ia te mau taata te tae mai i roto i teie nei haapiiraa teitei a'e.

Ua faaite mai o Amuleka ia tatou i te huru no teie nei oraraa, oia hoi, e oraraa faaineineraa teie. A tai'o tatou i te Alama 34:32 tei na ô mai e: *Inaha hoi, tei teie nei oraraa*

te taime ia faaineine te taata ia farerei i te Atua, oia ia, o te mahana ia, te mahana o teie nei oraraa, ia rave te taata i ta ratou ohipa.

I te taeraa mai o te taata i roto i teie haapiiraa; ua horoahia te tiamâ ia'na; ua horoa'toa hia mai te tahi mau tu-re e te tahi mau faaueraa ia'na, ei ravea ia ia faaineine oia ia'na no to'na farereiraa i te Atua. E oraraa raveraa ohipa teie e ia haere te taata i te toru o te haapiiraa, oia hoi, ia hoi oia i to'na Atua, e ia ore ia oti ta'na ohipa no teie haapiiraa, e a ore râ teie nei ao, ua ere oia i te reira haamaitai-raa,—no te mea— na ô maira te parau i papaihia e Ioane pī-pī here i roto i te Apokalupo 14:13: *Te parau maira hoi te Varua, oia mau, ia faaea ratou i te rave i ta ratou ohipa, e e pee hoi ta ratou ohipa ia ratou.* E mai te mea aita i oti ta'na ohipa faaineineraa no teie nei ao, e tuuhia teie taata i muri, mai te au i te ohipa tei ore i ravehia, no te mea aita e ohipa maitai ta'na i rave.

No reira, a-vaiiho tatou i te mau peu iino e te mau mea au ore i te Atua, a tatarahapa e a rave ana'e i te ohipa i ro-to i teie ao faaineineraa.

Papaihia e Ture Orometua.

IA PURE TATOU

MAI te hamaniraa o teie nei ao e tae noa'tu i teie nei taime, ua tiaturi te mau taata atoa e, te vaira te hoê taata tei hau roa'tu ia ratou atoa. O oia tei hamani i te ao e te mau mea atoa i roto. E huru rahi te mau taata tei ite i teie nei taata, oia hoi, te Atua, e e rave rahi te mau taata tei ore i ite ia'na, area ra ua faaroo i to'na reo.

Mai te mea e, o Oia te taata tei hamani ia tatou, e metua ia Oia no tatou mai to tatou nei na metua o tei fanau ia tatou i roto i teie nei ao. E mai te mea e, e metua Oia no tatou nei, e mea tia ia ia imi tatou i ta'na mau haamaitairaa e ta'na aratairaa no tatou mai ta tatou e imi nei i te mau haamaitairaa e te aratairaa no to tatou na metua no teie nei ao. E mai te hinaaro o to tatou na metua no teie nei ao ia horoa mai i te mau mea maitai na tatou, te hinaaro nei hoi te Atua to tatou metua i te ao ra, ia horoa mai i te mau mea maitai na tatou.

O vai ia i roto ia outou i te taata nei e hopoi i te ofai na ta'na tamaiti ia ani mai oia i te pane? E ia ani i te i'a e hopoi atu i te ophi na'na? E te tia na ia outou ino noa'i, ia horoa i te mea maitai na ta outou mau tamarii, a tae ai hoi i to outou metua i te ao ra i te horoa e te mea maitai i te feia i ani atu ia'na ra? Mataio 7:9-11.

Ia feruri tatou mai teie, aita roa e fifi ia pure tatou e eita tatou e faaroaroa i te pure e a ore ra faarahi i te mau parau rii faufaa ore mai te mau Etene e te feia haavare i te tau no Iesu. Ia pure râ tatou, e haere tatou i te hoê vahi moe, e e pure tatou i te Atua mai te mea ra e te paraparau nei tatou i to tatou metua no teie nei ao, e e ani tatou ia'na ma te faaroo e te haehaa i te mau mea e au na tatou.

Papaïhia e Iosepha Orometua.

Te unauna o te taata ra, to'na ia hamani maitai; e maitai to te taata haehaa i to te taata haavare. Na te mata'u ia Iehova e tae ai te taata i te ora; tei noaa ia'na te reira, e parahi ia ma te mauruuru; e ore oia e roohia e te ino. *Maseli 19:22-23.*

Te Amuiraa Atoqa i Hikueru.

TE faaite atu nei au i te huru o te mau ohipa i rave hia i roto i te Amuiraa i Hikueru nei.

Ua haamatahia te Amuiraa i te 5 no Atopa i te hora 8 i te poipoi na roto i te hoê Pureraa Autahu'araa, i te hora 10 e Pureraa A'oraa Evanelia e i te hora 2 i te ahiahi e A'oraa Evanelia, e e rave rahi te mau parau maitatai tei faaroohia i roto i taua mau pureraa ra, e i te hora 7 i te po e Haapiiraa no te mau Amaa no Hao, Amahu e Hikueru.

Ua faaterehia te haapiiraa matamua, na to Hao e Amanu, e haapiiraa titeti tatararaa i te Buka a Moromona na Paea o Tamaoko i faatere. Ua faataibia te mau pŭpŭ Kitara, pŭpŭ matamua, Hao e Amanu, pŭpŭ piti Tahiti, pŭpŭ 3 Hikueru, na to Taega e Nihiru te hoê himene tarava. Te piti no te Haapiiraa nō te Amaa no Hikueru, na Naia a Rua i faatere i te parau i roto i te Sire a Solomona 2:1; e haapiiraa hohoa nehenehe roa, e e rave rahi te mau taata tei tairuru mai i taua po ra, oia hōi, 128 taata tei tae mai.

I te hora 8 i te poipoi, i te 6 no Atopa, e Pureraa Autahu'araa, e te mau ohipa i ravehia i roto i taua pureraa ra o te faataa raa e te farii raa ia i te mau Taeae e te mau Tuahine i roto i to ratou mau toroa, e ua faaite mai te Peretiteini i to'na mau mana'o maitatai, e ua mauruuru roa te Autahu'araa.

I te hora 10, Pureraa a'oraa Evanelia; e rave rahi te mau taata tei tairuru mai i taua pureraa e e rave rahi te mau parau maitai i faaroohia e ua mauruuru roa te Amuiraa. I te hora 2 i te ahiahi, faatoroaraa, fariiraa e te a'oraa Evanelia, e rave rahi te mau parau maitatai i faaroohia i taua pure ra. I te hora 7 i te po, haapiiraa na te Amaa Taega e Nihiru,

na Tahiri a Toriki i faatere; e haapiiraa hohoa no te parau matamua i roto i te Genese 2:26; 3:1 te piti i roto i te Luka 10:25.38. Ua faataihia te mau pūpū Kitara e te mau pūpū himene, e mea uehenehe te mau ohipa i ravehia i taua po ra e e rave rahi te mau taata i tairuru mai i taua po ra, oia hoi 190 taata.

Te mau ohipa i ravehia i te 7, Haapiiraa na te Amaa no Hikueru, e haapiiraa hohoa no te Faahemaraa o Iesu, na Paata a Fareata i faatere; te piti, na Naia a Rua i faatere i te haapiiraa hohoa no te parau no te Paretenia; te toru o te haapiiraa, na te Amaa i Hao, na Tiaki a Pahoto i faatere i te parau no Naomi; te maha o te haapiiraa, na te Amaa no Hao, na Gahau a Keha i faatere i te parau i roto i te Maseli 7:11-18. Ua faataihia te mau pūpū Kitara e te mau himene tarava, e mea maitai roa.

Te mau ohipa i ravehia i te 8, i te hora 7 i te po. Haapiiraa na te Amaa no Amanu, haapiiraa no te parau o te Vahine i haere i te medebara, Apo. 12:1, na Paea a Tamaoko i faatere; te piti o te haapiiraa, te parau ia no te Ati Lamana Etene, na Paea a Tamaoko i faatere; te toru o te haapiiraa te parau ia no te Ati Lamana i nia i te mau mou'a, na Temakave a Kaverā i faatere; te maha o te haapiiraa o te parau ia no Golia e Davida, i roto i te I Samuela 17:1-4. Te opaniraa i te mau haapiiraa i te reira po, e haapiiraa na te Amaa no Hikueru, e haapiiraa ia no te Boy Scout, na Mahinui a Tehiva i faatere. Ua faataihia te mau pūpū Kitara e te mau himene tarava e e mea maitai roa, e ua faaite mai o Mahinui i to'na mana'o no nia i te mau haapiiraa i faaterehia i taua po ra. E ua faahoihia te faaotiraaa o te putuputuraa i roto i te rima o Pahoa a Rua, e ua tia mai oia i nia, e ua faaite mai i te Amuiraa e, e haapiiraa ta tatou i te 9 no Atopa i te hora 6 e te afa, ua te Peretiteni o te Misioni i te

mau fenua moana nei. Ua faaotihia te haapiiraa na roto i te himene e te pure.

Te mau ohipa i ravehia i te 9 no Atopa i te hora 6 e te afa, ua tairuru mai te mau taata e rave rahi i te fare pure e ua i roa te mau parahiraa i te mau taata. Na te Peretiteni te haapiiraa i taua po ra e ua tuu mai oia i te mau haapiiraa e rave rahi, te mau uiraa e te mau pahonoraa. Ua faataihia te mau pūpū kitara e te mau himene tarava, ua rahi roa to ratou oaoa e te mau taata i tarava i nia i to ratou ro'i, ua tia mai ratou i nia e ua haere ana'e mai ratou e mataitai i taua haapiiraa ra; ua i roa matou i te mauruuru e te oaoa, e te rahiraa o to matou mauruuru o te mau ohipa tauturu ia ta'na i rave.

Papaihia e Pahoa a Rua

TE PARAU A TE ATUA.

A FERURI rii tatou atoa nei i te reira parau, oia hoi te parau a te Atua ra. Ia oti to tatou feruriraa i taua vahi ra, a ui ana'e na tatou ia tatou iho, eaha mau ia te auraa no taua parau ra? No te tatararaa o te reira uiraa a hi'o na tatou i te pahonoraa a te Mesia ra i te uiraa faahe-ma a Satane tei papaihia i roto i te Mataio i te pene 4 e te irava 4; *Ua parau atu râ oia, na ô atura, ua papaihia, e ore te taata e ora i te maa ana'e ra, i te mau mea atoa râ i haapaohia e te Atua ra.*

Te na ô maira te tahi mau haapiiraa e, e mea navai te parau i papaihia i roto ana'e i te Bibilia ia farii tatou i te ora. Area te na ô mai nei te parau a te Bibilia e, e ora te taata

atoa nei i te mau parau atoa i haapaohia e te Atua ra: eiaha te mau parau ana'e i papaihia ra, te mau parau atoa ra i parauhia i mutaa ihora, e te mau parau hoi i parauhia nei, e te mau parau atoa hoi e parauhia a muri atu, o te mau parau ia e farii ai tatou atoa i te ora.

Eita hoi e nehenehe ia tatou nei i te tiaturi i te mau parau ana'e a te Bibilia, no te mea e, e rave rahi te mau buka a te Bibilia o tei moe ê atu, o ratou hoi ia tei ore i papaihia i roto i te Bibilia. Teie te tahi mau buka tei mo'ehia, oia hoi te *Buka Fafau* tei faaitehia i roto i te Exodo 24:7;

Te *Buka a Iasera* " Iosua 10:13.

Te buka e *Au i te hau Arii* i roto i te I Samuela 10:25;

Te buka a *Natana e a Gada* i roto i te I Paraleipo. 29:29;

Te buka a *Semaia* " II " 12:15;

Te buka a *Iehu* " II " 20:34;

Te buka a *Uzia* " II " 26:22.

Te *Episetole i te mau Korinetia* i roto i te I Korinetia 5:9,

Te *Episetole i te mau Ephesia* " Ephesia 3:3;

Te *Episetole i te mau Kolosa* " Kolosa 4:16:

Te *Episetole a Iuda* i mo'e ra. E rave rahi atu â te mau buka tei mo'ehia e tei ore i papaihia i roto i te mau parau o te Bibilia.

A tai'o faahou â na tatou i te parau a Ioane i te pene 21 e i te irava 25; *E rave rahi â ta Iesu peu i rave, ahiri i hope atoa i te papaihia, te mana'o nei au, e ore e tia i to te atoa nei ia farii mai i taua mau buka ra, ahiri i papaihia.* Na taua mau irava i nia nei ra e faaite mai ia tatou e, e mea iti te parau mo'a i papaihia, o te parauhia e, ua rahi mau ia.

Teie ra te tahi irava tei faaite mai ia tatou nei e, e ore roa te taata e paari i te parau o te Bibilia ana'e ra. Te na ô maira Ioane i roto i te pene 5 e te irava 39: *Te imi nei outou i te parau i papaihia ra, no te mea te mana'o na outou e roaa*

te ora mure ore i reira; o te faaite ia ia'u o taua mau parau ra.

Eita roa e nehenehe ia tatou ia tiaturi i te Bibilia ana'e ei aratia no te aratairaa ia tatou i te vahi i opuahia e te Atua. Area o te mau parau atoa ra i haapaohia e te Atua ra. Te aratia mau o te Varua Maitai ia, mai te au i te parau a Ioane i te pene 16 e i te irava 13. *Ia tae mai ra te Varua parau mau ra, na'na ia e aratai ia outou i te mau parau mau atoa ra; e ore hoi ta'na parau e riro na'na iho; o ta'na ra i faaroorā, o ta'na ia e parau mai, e na'na hoi e faaite mai ia outou i te mau mea e tupu a muri atura.* A tai'o faahou â i roto i taua Ioane ra i te pene 14 e i te irava 26. *Na te Faaa'orā, na te Varua Maitai ra, o ta te Metua e tono mai ma to'u nei i'oa ra, na'na e haapii mai ia outou i te mau mea atoa; e e faaite faahou mai hoi ia outou i te mau parau atoa ta'u i parau atu ia outou na.*

Na teie mau irava i faaite mai ia tatou e, e ore roa te taata e farii i te ora i te Bibilia ana'e ra, i te mau parau atoa ra i haapaohia e te Atua, *O te ora iho ā ia.*

Papaihia e Rui Orometua.

O te îraa o te fenua nei, no outou ia; te mau puaa o te aru, e te mau manu no te reva, e te mau mea e paiuma haere na nia i te raau ra e o tei hahaeere na nia i te fenua nei, oia ia, e te mau raau rii, e te mau mea maitatai o te tupu mai na raro i te fenua nei, ei maa e ei faaahu, e no te mau fare, e te mau fare vairaa maa na te puaa, e te ô raau rahi maa, e te ô maa rii, e te aua faaapu vine; e te mau mea atoa e na raro mai i te repo i te tupu i te tau mau ra, ua hamanihia ia na te taata, e ei maitai no te taata, ia mauruuru te mata, e ei faaoaoa i te aau: oia ia, ei maa e ei faaahu, no te amu e no te hau'a, ei faaetaeta i te tino e ei faaitoito i te varua. E ua mauruuru te Atua ia horoa Oia i teie atoa nei mau mea na te taata; no reira hoi i hamanihia'i, ia ravehia mai te au, eiaha mai te amu faatina, eiaha atoa mai te titauroa tia ore. B. F. 59:16-20.

TE MHU PARAU API

Ua maitihia ei Auvaha.

I te ava'e no Setepa i mairi a'enei ua maitihia, e te taata Faatere hau no te fenau America, te taata ra o Franklin S. HARRIS, te faatere no te Brigham Young University, ei hoê oia no rotopu i na Auvaha e 7 ta te Hau America e tonono atu i roto i te hoê apooraahi rahi te faatupuhia i te oire ra o Mexico. E rave rahi te mau buka ta teie nei taata i papai, area ra o te ohipa no te pae faaapu ta'na i haapii rahi roa.

E ati rahi mau.

Ua tupu a'enei i te tufaa fenua Florida, America, te hoê ati matai rahi ri'ari'a; no te puai o te matai ua parari noa te mau fare mai te huero moa pau ra e ua fatifati noa te mau tumu raau e ua tae te 1000 o te taata tei pohe i roto i taua ati ra.

Ua faainuhia i te ava.

No te horaraa te tahi mau uri taata i rapae i to ratou mau'aua'ua imi te mau taata tiai i te mau ravea ia noaa faahou mai ratou e ua manuia rii ratou no te mea ua roaa te rahiraa o te uri taata maori ra e 15. Ua imihia te mau ravea atoa ia noaa ratou e no te manuia ore na tamatahia te hoê ravea hopea, e taua ravea ra teie ia, i roto i te mau farii pape atoa tei tuu haere hia na roto i te uru raau tei parahihia e te mau uri taata, na tuhia te ava i roto i te hora ahiahi, e ia poipoi a'era e toru uri taata tei noaa i te haru ma te peapea ore no te mea ua taero roa ratou i te inu rahiraa i te ava taero. E ravea maitai mau te reira.

Ua maitihia ei Orometua haapii.

I roto i te ava'e no Setepa i mairi a'enei ua haere te Aposetolo ra o Ioane A. VISETO i te oire ra o Los Angeles. Ua haere oia i taua oire ra no te mea ua maitihia oia ei orometua haapii i roto i te University of Southern California, no te hapiiraa'tu i te mau parau tumu no te Ekalesia a Iesu Mesia i te Feia Mo'a i te mau Mahana Hopea nei.

E parau no te tamai.

Te faaitehia nei i roto i te mau ve'a no Marseille, Farani, no te tamai e tupu nei i rotupu i te Italia e te Etiopia, ua tono te Hau Farani i na pū-pū faehau taata ereere, eia hoi na regiment Senegalais i te oire farani ra o Djibouti no te tiairaa i te mau taata i reira.

Ua pohe roa i te debure.

I te oire ra o Cloverdale, ua pohe roa te taata ra Torter HOLLEY i te 42 raa o to'na matahiti e mai te au i te parau a te taote tei rave ia'na, ua pohe oia no te taero o te patia o te debure, oia hoi te mana hamani momona. Mai te au i te parau a te taote, no to'na paruparu i pohe ai oia.

Ua mairi te 300 maile.

I te 4 no Setepa i mairi a'enei ua faatere te taata Baratane ra o Malcolm CAMPBELL i to'na pereoo uira i nia i te hiti o te Roto Miti i Utaha, e ua tae oia i te 301 maile e tiahapa i te hora. O oia te taata matamua tei tae i taua tere ra na nia i te pereoo uira e te opua nei oia ia faahoro faahou i to'na pereoo uira ia hau atu i te tere.

Ua horoahia te Fetia haamana'oraa.

No ta ratou mau himeneraa e ta ratou mau ohipa maitatai, ua horoahia na te Pūpū himene no te Fare Menemene, te hoē fetia piru ei haamana'oraa no to ratou himeneraa i roto i te hi'opoaraa rahi tei faatnpuhia i te oire ra o San Diego. Na te Tomite faatere o taua hi'opoaraa i horoa i taua fetia ra e ua papaihia i nia iho: Na te Pūpū himene Momoni ma to matou au maitai.

Louis Drollet Gérant

Le Roy Mallory Imprimeur.

Rue Dumont d'Urville, Orovini, Papeete, Tahiti.